

Tutu ña ni ke'i San Pablo kua'an nda'a' ne ini xini Jesús, ne ndiee' ñuu Colosas

Ti'vi' ra cha'an' nia

¹ Yu'u nduu' Pablo, te Jesucristo ni tianu' yu'u te sania'á i ichi' a saa kuní Ndiosí, te xiin' Timoteo, ñani ta'an' e' ndii, ti'vi' ndu cha'an' ndo'ó, ² ñani ta'an' ndu, ne nduu' kuenta Ndiosí, ne xika' ndaku ichi' Cristo, ne ndiee' ñuu Colosas. Na sañu'u' va yuva' e' Ndiosí ndo'ó, te na taxi tu a ña maní' koo xiin' ndo'.

Ka'an Pablo xiin' Ndiosí xa'a' ne ini xini Jesús xiin' ra

³ Sakuu' ichi' kij' ka'an' ndu xiin' Ndiosí, yuva' xto'o e' Jesucristo ndii, taxi' ndu ña chindani a xa'a' ndo'. ⁴ Sakan' ña ni xini ndu kuento ña ini ndo' xini ndo' Cristo Jesús, te kundani tu ndo' sakuu' ne nduu' kuenta Ndiosí ⁵ xa'a' a ña ndiatu' ini ndo' ña natiin ndo' ña kumi' Ndiosí xa'a' ndo' ndivi'. Te xa xini ndo' xa'a' ña jaan', sakan' ña xa ni xini so'o ndo' tu'un va'a ndixa ña ka'an' xa'a' Jesús, ⁶ ña xa ni xaa ndee mii' ndiee' ndo'. Te tu'un va'a jaan' ndii, kiku' a, te sanduva'a a kivi' ñuu ne yivi' kanii' iin yivi' naa ni xaa a xiin' ndo'ó ndee kivi' nuu' ña ni xini so'o ndo' a, te ni kundani xna'a ndo' xa'a' ña ndani mii' Ndiosí yoo'. ⁷ Te Epafras, ñani maní' ndu, ni sania'á ndo'ó ña jaan'. Te jaan' ndii, te xachuun' xiin' ndu nduu' ra, te xika' nuu' ndaku ra nuu' Cristo xa'a' ña va'a ndo'ó. ⁸ Te ni ka'an ra xiin' ndu ña ndani ta'an' ndo' xaa' Espíritu Santo.

⁹ Xa'a' a jaan' na ndee kij' ni xini ndu ña ni ka'an ra xa'a' ndo' jaan' ndii, ka'an' te ka'an' ndu xiin' Ndiosí xa'a' ndo', te sakuni' ndi'i' a ndo'ó ña kuní a saa ndo', te sakutu' tu a

ndo'ó xiin' ña xini tuní, xiin' ña kundani ña taxi' Espíritu Santo, ¹⁰ te kaka ndo' saa xata'an nuu' xto'o e' Jesús, te sakuatia' ndo' a xiin' sakuu' ña xaa' ndo', sakan' ña saa ndo' ña va'a, te kua'nu tu ndo' xiin' ña xini va'a ka ndo' Ndiosí. ¹¹ Te xikán tu ndu nuu' a ña taxi' a ndiee' ndo' xiin' ña ndiee' a ña ndatun' koo' chukuu' ña kumi' a, te kivi kundieni kuie ndo' nuu' sakuu' tundo'o'. ¹² Te nakuatia' nimá ndo' taxi' ndo' ña chindani yuva' e' Ndiosí ña ni sako' tu'va yoo', te natiin na e' ña xito' natiin ne nduu' kuenta a mii' xa'ndia chuun' a mii' ndatun' koo' chukuu', ¹³ sakan' ña ni sakakú a yoo' nuu' ña xiko' ni'i' ña iin yaví, ña nduu' kuenta ña ndiva'a, te ni ndasanduú a yoo kuenta Cristo, si'e maní' a, ¹⁴ ña ni nacha'vi' xa'a' kuachi e' xiin' níi' a, te xiin' ña jaan' ni yoo ka'nu' ini Ndiosí xa'a' kuachi e'.

Ni nakoó e' ña maní' xiin' Ndiosí xa'a' ña ni ndo'o Jesucristo

¹⁵ Te Cristo jaan' nduu' ña nakuitá xachi' xiin' Ndiosí, ña kivi kuni e', te nia'a a yoo' saa kuu' Ndiosí, te xi'na a ni xikoó te sakan' sakuu' ña yoo'. ¹⁶ Sakan' ña suvi' a ni xa'a sakuu' ña yoo ni xaa Ndiosí, ni xa'a a ña yoo ndivi', xiin' ña yoo nuu' ñu'u' iin yivi', ña kivi kuni e', xiin' ña kivi kuni e', naa kuu' ña kumi' ndiee' ka'nu', xiin' naa kuu' ña xa'ndia chuun' ka'nu', xiin' naa kuu' ña xa'ndia chuun', xiin' naa kuu' ña kumi' ndiee'. Cristo jaan' ni xa'a sakuu' ña yoo, te xa'a' mii' a ni xa'a ña'a' a. ¹⁷ Te ña jaan' ndii, xa yoo a ndee kij' tia'an koo ndee iin ña'a. Te xiin' ndiee' a yoo yukun sakuu' ña yoo. ¹⁸ Te ña jaan' nduu' xini' sakuu' ne nduu' kuenta a, ne nduu' ndee naa ñu'u' nde'j a. Te suvi' tu a nduu' xa'ndu sakuu' ña yoo, te xi'na tu a ni natiaku tein ne ni xi'i te kunduu a ña ka'nu' kuu' nuu' nuu' sakuu' ña yoo. ¹⁹ Sakan' ña mii' Ndiosí ni xtani ña nakuitá xachi' ña jaan' xiin' a, ²⁰ te xiin' ña ni ndo'o a ni nakoó Ndiosí ña maní' xiin' sakuu' ña yoo, ña yoo nuu' ñu'u' iin yivi', xiin'

Colosenses 1:21 3 Colosenses 1:29

ña yoo ndivi' ndii, ni natandíee maní' a sakuu' ña jaan' xa'a' a ña ni xitia níi' Cristo jaan' nuu' krusín.

²¹ Sakan' tu ndo'ó saa' ndii, xika' ni yoo' ndo' nuu' Ndiosí xa'a' a ña kiní ña ni xaniní ndo', xiin' ña ña'a' ña ni xaá ndo', te ni kundasi' ndo' Ndiosí. Te ndii, xa ni natandíee maní' Cristo ndo'ó xiin' Ndiosí vitin ²² xa'a' a ña ni xi'i a xa'a' kuachi ndo' kii' ni xika a iin yivi', te ndoo koo ndo' kii' sanakua'a a ndo'ó nuu' Ndiosí, te ndoo tu nimá ndo', te koo' ndee iin xa'a' ña tiin kuachi Ndiosí yoo' nuu' a ²³ naa' ita' ni'i ndo' nuu' ña ini e' xini e' Jesús, te künundia'a ndo' nuu' a, te küxioo tu ndo' nuu' ña ndiatu' ini e' ña ni natiin ndo' kii' ni xini so'ó ndo' xa'a' tu'un va'a, ña ka'án ndoso' te yivi' kani' iin yivi'. Te ni sakuiso' chuun' tu Ndiosí yu'u Pablo, te ka'án ndoso' i ña jaan'.

Ndo'o' Pablo xa'a' ne ndikún ichi' Jesús

²⁴ Nakuatia' nimá i vitin nuu' ña ndo'o' i xa'a' ndo' xiin' ñu'u' nde'i i, sakan' ña xiin' ña jaan' saxinú i ña ni ndo'ó Cristo xa'a' ne nduu' kuenta a, ne nduu' ndee naa ñu'u' nde'i a. ²⁵ Te ni sakuiso' chuun' Ndiosí yu'u te xika' nuu' i nuu' ndo'ó, ne nakayá xa'a' Jesús, te ka'án ndoso' xinu i tu'un va'a ²⁶ ña ni yoo' si'e nuu' sakuu' ne yivi' ndee xta'an' iin yivi', xiin' ndee kii' ni xa'a' yoo ne yivi'. Ndisu vitin ndii, xa ni satuví ña'a' Ndiosí nuu' ne nduu' kuenta a. ²⁷ Sakan' ña ni kuní a ña kundani ndo'ó, ne tuku', ne nduu' kuenta a, ña ka'nu' koo' chukuu' ña ni yoo' si'e jaan'. Te Cristo nduu' ña jaan', te naá a nimá ndo', xa'a' a jaan' na ndiatu' ini ndo' ña kundíee ndo' mii' ndatun' koo' chukuu' kaa'. ²⁸ Te xa'a' Cristo jaan' ka'án ndoso' ndu nuu' sakuu' ne yivi'. Ndiaa yu'u' ña'a' ndu, te sania'á tu ña'a' ndu xiin' sakuu' ña xini tuní ña kuaxi nda'a' Ndiosí, te kuví sanakua'a ña'a' ndu nuu' Ndiosí nduu' ña ne ndaku nimá xa'a' a ña ini ña xini ña Cristo Jesús. ²⁹ Xa'a' a jaan' na

xachuun' u'vi i nuu' Cristo xiin' ña ndiee' ña taxi' a nuu' i, te saxinú i ña ni sakuiso' chuun' a yu'u.

2

¹ Te kuní i ña kundani ndo' saa vi' xachuun' u'vi va i xa'a' ndo'ó, xiin' xa'a' ne ndiee' ñuu Laodicea, xiin' xa'a' sakuu' ne tía'an kuní saa kaa' nuu' i. ² Xaa' i sakan' te sandieni i nimá ndo', te iin ndaa' kunduu ña ndani ta'an' ndo', te kundani ndi'i ndo' sakuu' ña xini tuní, sakan' te kundani ndo' ña ndichi ña yoo si'e xa'a' yuva' e' Ndiosí, te ña ndichi jaan' nduu' Cristo. ³ Te ña jaan' nduu' ña kumi' sakuu' ña ndiaa ya'vi' koo' chukuu', ña yoo si'e, ña xini tuní xiin' ña ndichi xava'a. ⁴ Ka'án i ña yo'o' xiin' ndo' te küni xa'an' ndee iin ne yivi' ndo'ó xiin' kuento ndatun' saka. ⁵ Kuachi ndii, tee' ndee köo' i yoo xiin' ndo', ndisu yoo nimá i xiin' ndo', te nakuatia' i ña ndiee' maní' xiin' ta'an' ndo', te ita' ni'i tu ndo' nuu' ña ini ndo' xini ndo' Cristo.

⁶ Sakan' na kuii' xa'a' a ña ni natiin ndo' Jesucristo nduu' xto'o ndo' ndii, kaka ndo' saa kuní a, ⁷ tiin' kutu' ña'a' ndo', te kuíta kutu' tu ndo' nuu' tu'un a, te kuíta ni'i ndo' nuu' ña ini e' xini e' Jesús saa nii' ni sania'á ra ndo'ó, te taxi va ndo' ña chindani Ndiosí.

Ni sandoó ndiká Cristo yoo' nuu' kuachi e' te nduu' e' ne yivi' xaa'

⁸ Koto xiin' mii' va ndo', te küni xa'an' ndee iin ne yivi' ndo'ó xiin' ña xini tuní saka, ña kuäsa' kuní, ña ka'án xa'a' ña xi xaá te yivi' kuiti', te ka'án tu a saa kuní ña xiko' ni'i' ne yivi', ne nduu' kuenta iin yivi', te süu' ka'án ña jaan' saa kuní Cristo. ⁹ Sakan' ña nakuitá kanii' Cristo xiin' ña kuu' Ndiosí. ¹⁰ Te ndo'ó ndii, xa yoo xinu ndo' te saa ndo' ña kuní Ndiosí xa'a' a ña ini ndo' xini ndo' Cristo, te ña jaan' nduu' xini' nuu' sakuu' ña kumi' ndiee' xiin' ña xa'ndia chuun'. ¹¹ Te sakan' tu xa'a' a ña ini ndo' xini ndo' Jesús

ndii, ni xa'a a tuni ndo', ndisu süu' tuni naa ña xa'a nda'a te yivi' nduu' ña jaan', süu' jaan' ndii nduu' a ña tava' Jesús ña ndioo' ini iin' ndo' saa ndo' kuachi. Te ña jaan' nduu' ndee naa tuni ndo' ña ni xa'a Cristo. ¹² Kii' ni chichi ndo' kuenta Cristo ndii, ndee naa ni kuxi tu ra ndo'ó xiin' a tixin ñu'u', te ni ñatiaku inga' tu ndo' xiin' a xiin' ndiee' Ndiosí xa'a' a ña ini ndo' xini ndo' Jesús, te ndiee' jaan' nduu' ña ni tiin Ndiosí, te ni sanatiaku ña'a' a tein ne ni xi'i.

¹³ Te ndo'ó ndii, ni nduu ndo' ndee naa ne ni xi'i nuu' Ndiosí xa'a' a ña ni xiko ni'i' kuachi kivi' ñuu ndo', te ni nduu ndo' kuenta Ndiosí xa'a' a ña koo' tuni iin' ndo'. Ndisu Ndiosí ndii, ni sanatiaku inga' a ndo'ó xiin' Cristo kii' ni yoo ka'nu' ini a xa'a' kuachi e', ¹⁴ sakan' ña ni sandoyo' a sakuu' ña yoso' xa'a' e', ña ni xka'ndia e' ña ka'an tu'un ndei' a, ña ni tiin kuachi yoo'. Ni tiin ña'a' a, te ni kuxi ña'a' a nuu' krusin, te sakan' ni sandoyo' a ña ka'an ña jaan' xa'a' kuachi e'. ¹⁵ Te sakan' ni tu'un a ña ndiee' nuu' sakuu' ña kumi' ndiee' jaan', xiin' nuu' ña xa'ndia chuun' kii' ni sandiee' kui'e tuvi' ña'a' a nuu' kua'a' ne yivi', xiin' ña ni xaa Cristo nuu' krusin.

¹⁶ Xa'a' a jaan' na kuii' saa ndo' kuenta ña ka'an kini ne yivi' xiin' ndo' xa'a' ña xixi' ndo', xiin' ña xi'i' ndo', ni ndee xa'a' a ña xito' ka'nu' ndo' kivi' ña tuu ne jaan' ka'nu', xiin' a xa'a' ña xito' ka'nu' ndo' kivi' ña nduu' itia' yoo', xiin' xa'a' a ña xito' ka'nu' ndo' kivi' sábado, ña xinandiee' nia. ¹⁷ Te sakuu' ña jaan' nduu' kunda'vi ña kixin, ndisu ña ka'an xna'a ña jaan' xa'a' ndii, Cristo nduu' a. ¹⁸ Te taxí ndo' ñakasi ndee iin ne yivi' ndo'ó nuu' ña sani'í' Ndiosí ndo'ó, sakan' ña ne jaan' ndii, xasuvi' nia ña nda'vi ini nia, te xaka'nu' tu nia ángele, te ka'an ñuñu' nia ña satuví a nuu' nia, te chitu' vi' xini' nia ñu'u' ña kuasa' kuní. ¹⁹ Te ne jaan' ndii, ndikún nia Cristo, ña nduu' xini' sakuu' yoo', ne ini xini a, ne nduu' ndee naa ñu'u' nde'i

a, xiin' mii' ñu'u' ta'an' iki' mii' tiin' tuchi xii ñu'u' nde'i jaan'. Sakan' ña saxka'ndía a sakuu' ña kuní a xa'a' yoo', ne ini xini a. Te sakan' sanduun' ña'a' a, te xa'nu' e' saa kuní Ndiosí.

²⁰ Naa' ndixa xna'a xa ni xi'i inga' ndo' xiin' Cristo nuu' ña xiko' ni'i' ne yivi', ne nduu' kuenta iin yivi' yo'o' ndii, ñndichun na xika' ndo' ndee naa xika' ne nduu' kuenta iin yivi', te ndikún ndo' ña xaa' ne jaan'? ²¹ Naa kuu' ña ka'án nja ndii: “Küní nda'a' un' ña kaa', koto un' saa iin' ña yo'o', töndia un' ña yo'o' xiin' nda'a' un'”, kachi nja. ²² Te sakuu' ña jaan' ndii, ka'án a xa'a' ña sania'á te yivi' xiin' ña ka'án chuun' mii' kuiti' ra, te ña ndoñu'u' kunduü a kii' ya'a kivi' yoo a. ²³ Ña ndixa nduu' a ndii, sakuu' ña sania'á ne jaan' ndii, ndee naa ña xini tuní xna'a xa'a' ichi' Ndiosí nduu' a, sakan' ña ka'án a saa kaka nja ichi' Ndiosí, xiin' saa kunda'vi ini nja, xiin' saa sando'o' xiin' mii' nja. Ndisu ndee sie chindiee' ndee iin ña jaan' yoo', te nakoo e' kuachi ña ndioo' ini iin' e.

3

Na kanini e' xa'a' ña yoo ndivi' kuiti'

¹ Te xa'a' a ña ni natiaku inga' ndo' xiin' Cristo ndii, nduku' naa nduku' ndo' ña'a' ña yoo ndivi' mii' ndu'u' Cristo nda'a' ku'a' Ndiosí. ² Te kanini ndo' xa'a' ña nduu' kuenta ndivi', te kanini ndo' xa'a' ña nduu' kuenta iin yivi'. ³ Te xa'a' a ña ni xi'i ndo' nuu' ña kuní iin' mii' ndo' ndii, nda'a' Ndiosí yoo si'e kivi' ñuu ndo' ni xaa Cristo. ⁴ Te kii' natuvi Cristo, ña taxi' kivi' ñuu e' ndii, natuvi tu ndo'ó xiin' a mii' ndatun' kaa'.

Na nakoo e' sakuu' nuu' kuachi

⁵ Xa'a' a jaan' na kütiaaku ka ndo' nuu' ña kuní iin' mii' ndo': naa kuu' ña kumi' ndo' musa ndo', xiin' ña xe'na' ndo', xiin' ña kini ndioo' ini ndo', xiin' ña ka'án nimá ndo'

saa ndo' ña kinj, xiin' ña ndioo' inji va ndo' xa'a' ña'a, te ndee naa iin ndiosí ndo' nduu' ña jaan'. ⁶ Te ne xaa' ña jaan' ndii, chie va tundo'o' taxi Ndiosí kundo'o' nia. ⁷ Te ni xaa tu ndo'ó ña ka'an jaan' kii' ni xika ndo' xiko ni'i' ña jaan' kivi' ñuu ndo'. ⁸ Ndisu vitin ndii, kuni a ña nakoo ndo' sakuu' ña yo'o': naa kuu' ña nasaá' ndo', xiin' ña kui'e ndo', xiin' ña chichi' inji ndo', xiin' ña kania'a ndo' xa'a' ne yivi', xiin' ña va'a yu'u' ndo'. ⁹ Te kuni xa'an' ta'an' ka ndo', sakan' ña vitin ndii xa ni nakoo ndo' kivi' ñuu yata', xiin' sakuu' ña ni xaa ndo', ¹⁰ te xa ni nandu ndo' ne yivi' xaa'. Sakan' na i'in kivi' kua'an nakuitá ka kuu' ndo' saa kuu' Ndiosí, ña ni xa'a yoo', ndee skachi' xaa kivi' ña kundani ndi'i ndo' xa'a' a. ¹¹ Te koo' a xaa' a naa' nduu' e' ne tuku', uun ne judío, naa' yoo tuni iin' e', uun naa koo' a, naa' ne nda'vi so'o nduu' e', uun ne iku' nduu' e', naa' ne xiko' ni'i' iin xto'o nduu' e', uun naa' ne xika' ndiká nduu' e'. Süu' jaan' ndii Cristo nduu' ña xa'ndia chuun' nuu' e', te suvi tu a naá nimá sakuu' e'.

¹² Te xa'a' a ña ni nakaxin Ndiosí yoo', te nduu' tu e' kuenta a, te ndani a yoo' ndii, nia'a ndo' ña va'a kuu' ndo', xiin' ña kuvita inji ndo', xiin' ña ndasun inji ndo', xiin' ña nda'vi kuu' nimá ndo', xiin' ña maso kuu' ndo', xiin' ña kuie inji ndo'. ¹³ Te sakan' tu kundieni ndo' kuni ta'an' ndo', te koo ka'nu' inji ndo' kuni ta'an' ndo'. Te naa' yoo ndo' tun kui'e xiin' ta'an' ndo' ndii, koo ka'nu' inji ndo' xa'a' ta'an' ndo' saa nii' ni yoo ka'nu' inji Cristo xa'a' e'. ¹⁴ Te ña ka'nu' ka nuu' sakuu' ña jaan' ndii, ña kundani ta'an' ndo' nduu' a, sakan' ña ña jaan' nduu' ña ndasaiin' xachi' yoo'. ¹⁵ Te na koo na ña manj', ña taxi' Cristo, nimá ndo', kuachi ndii ni kana Ndiosí ndo'ó te kunduu ndo' ndee naa iin ndaa' ñu'u' nde'i, te kundiee manj' ndo'. Te taxi na ndo' ña chindani Ndiosí.

¹⁶ Te na koo kua'a' tu'un va'a xa'a' Cristo nimá ndo' te kuvi sania'á ta'an' ndo', te kuvi tu kondia yu'u' ta'an' ndo'

xiin' sakuu' ña xini tuní ña kuaxi nda'a' Ndiosí. Te kata ndo' nuu' a taxi' ndo' ña chindani a xiin' yaa ña yoso' nuu' tutu Salmos, xiin' yaa ña kuie kua'an, xiin' yaa ña saka'an Espíritu nimá ndo'. ¹⁷ Sakan' na kuii' ndee ka ña ka'an ndo', uun ndee ka ña xaa' ndo' ndii, saa ndo' sakuu' ña jaan' xiin' ndiee' xto'o e' Jesús taxi' ndo' ña chindani yuva' e' Ndiosí xa'a' ña ni xaa Jesús.

Saa xata'an kaka ne ndikún ichi' Jesús

¹⁸ Ndo'ó, ña'a', ne yoo ii' ndii, kuni a ña kaka nuu ndo' nuu' ii' ndo' xiin' iin kanii' nimá ndo' saa xata'an saa ne ndikún ichi' xto'o e' Jesús. ¹⁹ Ndo'ó, te yoo ña' si'i ndii, kundani ña'a' ndo', te mii' kuu ndo' xiin' a'. ²⁰ Ndo'ó, ne kuachi' ndii, kandixa' ndo' sakuu' ña ka'an yuva' si'i' ndo' xiin' ndo'. Kuachi' ndii va'a kuni xto'o e' Jesús kij' xaa' ndo' ña jaan'. ²¹ Ndo'ó, yuva' si'i' ndii, mii' kuu ndo' xiin' si'e ndo' koto ka kuu soo ini nia. ²² Ndo'ó, ne xiko' ni'i' iin xto'o ndii, kandixa' ndo' sakuu' ña ka'an xto'o ndo' iin yivi' yo'o' xiin' ndo'. Te süu' kandixa' ña'a' ndo' kij' xito' ndi'e' kuiti' ne jaan' ndo'ó te ndoo va'a ndo' nuu' nia. Süu' jaan' ndii xiin' iin kanii' nimá ndo' kandixa' ña'a' ndo', sakan' ña xito' ka'nu' ndo' xto'o e' Jesús. ²³ Te ndee ka ña xaa' ndo' ndii, saa ndo' a xiin' iin kanii' nimá ndo' ndee naa xika' nuu' ndo' nuu' xto'o e' Jesús, te süu' nuu' ne yivi' kuiti'. ²⁴ Kuachi' ndii xiní ndo' ña natiiin ndo' ña va'a nda'a' Ndiosí ndivi', sakan' ña nuu' xto'o e' Cristo xika' nuu' ndo' kij' xika' nuu' ndo' nuu' ne yivi' jaan'. ²⁵ Ndisu yoo ka xaa' ña nia'a ndii, nacha'vi mii' nia xa'a' ña jaan' saa Ndiosí, sakan' ña iin kachi kuu' ña jaan' xiin' sakuu' ne yivi'.

4

¹ Ndo'ó, ne nduu' xto'o vitin ndii, sachuun' ndaku ndo' xiin' ne xika' nuu' nuu' ndo', te iin kachi tu kuu ndo' xiin' nia naka'an' ndo' ña yoo tu iin xto'o ndo'ó ndivi'.

² Nākoo ndo' ña ka'án chito ndo' xiin' Ndiosí, te koo tu'va ndo' kii' ka'án ndo' xiin' a taxi' ndo' ña chindani a. ³ Te kii' ka'án ndo' xiin' a ndii, kakan tu ndo' nuu' a te nunia' a ichi', te kuvi ka'an ndoso' ndu tu'un va'a xa'a' Cristo, ña ni yoo si'e nuu' ne yivi', ña naá i vi'e kaa xa'a'. ⁴ Te ka'an tu ndo' xiin' Ndiosí xa'a' i te kuvi ka'an ndoso' kaxi' i ña jaan' saa kuní a.

⁵ Te kaka ii' ndo' nuu' ne tia'an ini kuni Jesús, te koo tu'va xava'a ndo' sakuu' ichi' kii' kuvi ndatu'un' ndo' xiin' nia. ⁶ Te sakuu' ichi' kii' ndatu'un' ndo' xiin' ne jaan' ndii, va'a va ka'an ndo', te sii' tu ka'an ndo'. Sakan' te kuvi nakuiin va'a ndo' nuu' i'in ne yivi'.

Cha'an' so'g' ndi'i

⁷ Tíquico, ñani mani' e', te xika' nuu' ndaku nuu' xto'o e' Jesús xiin' i, ka'an xiin' ndo' xa'a' i kii' xaa ra mii' ndiee' ndo'. ⁸ Ti'vi' i ra te ka'an ra xiin' ndo' saa ndiee' ndu, te sandieni ra nimá ndo'. ⁹ Te ti'vi' ña'a' i xiin' Onésimo, ñani mani' e', te ni kiee ñuu ndo', te xika' nuu' ndaku nuu' xto'o e'. Te ka'an uví saa' te jaan' xiin' ndo' sakuu' ña xka'ndiá yo'o'.

¹⁰ Ti'vi' Aristarco, te naá vi'e kaa xiin' i, cha'an' ndo'. Te sakan' tu ti'vi' Marcos, te nduu' saxin Bernabé, cha'an' ndo'. Te xa ni natiin ndo' iin tutu ña ka'án chuun' xa'a' ra. Te natiin va'a ña'a' ndo' naa' naxaa ra ñaa'. ¹¹ Te ti'vi' tu Jesús, te nani' tu Justo, cha'an' ndo'. Te uní ta'an yo'o' kuiti' nduu' te judío, te xachuun' inga' xiin' i te ki'in' ka ne yivi' ka'ndia chuun' Ndiosí nimá, te xandieni kua'a' tu ra yu'u. ¹² Ti'vi' ni tu te ñuu ndo' Epafras cha'an' ndo', te xika' nuu' nuu' Cristo. Te ka'án ndiee' ra xiin' Ndiosí xa'a' ndo' te kuita ni'i xava'a ndo' nuu' ichi' a, te kuixa tu ini ndo' nuu' a, te saxinú ndo' sakuu' ña kuní a. ¹³ Te kuvi ndiee' yu'u' i ña xachuun' u'vi' va ra xa'a' ndo' xiin' xa'a' ne ndiee' ñuu Laodicea xiin' xa'a' ne ndiee' ñuu Hierápolis.

¹⁴ Te ti'vi' tu Lucas, te tatan', te ndani' e', cha'an' ndo', te sakan' tu Demas.

¹⁵ Te kua'an Ndiosí koo ñani ta'an' e', ne ndiee' ñuu Laodicea. Te kua'an Ndiosí koo tu Ninfas, te sakan' tu ne nakayá xa'a' Jesús vi'e a'. ¹⁶ Te kii' ndi'i ka'vi ra tutu yo'o' nuu' sakuu' ndo'ó ndii, saya'á ndo' a nda'a' ne nakayá xa'a' Jesús ñuu Laodicea te ka'vi tu ne jaan' a. Te ndo'ó tuku ka'vi tutu ña ni tivi' i nda'a' ne jaan' kii' taxi ña a nda'a' ndo'. ¹⁷ Te ka'an ndo' xiin' Arquipo ña saxinú ra chuun ña ni sakuiso' chuun' ña'a' xto'o e'.

¹⁸ Mij' yu'u, te nduu' Pablo, ke'i i xiin' nda'a' i vitin. Ti'vi' tu i cha'an' ndo'. Naka'an' ndo' ña vi'e kaa naá i. Te na sañu'u' na xto'o e' Jesucristo ndo'ó. Sakan' na kunduu a.

El Nuevo Testamento en el Mixteco de Ayutla
Mixtec, Ayutla: El Nuevo Testamento en el Mixteco de Ayutla New
Testament

copyright © 2016 Wycliffe Bible Translators, Inc.

Language: Ayutla Mixtec

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 13 Jun
2022

7e4f3497-fb83-5234-ac91-e00e1d534904